



*Kamis, 25 Januari 2024*  
**Ogen: Kejadian 28:16-22**



**"Keke Erpagi-pagi"**



Jakup e me anak si ikelengi nandena. Ia sekalak anak si teneng ras senang akapna tading i rumah (Kej.25:27-28). Erkiteken kesalahenna man Esau seninana, ia arus lawes ras kiam i rumah nari; arus i tadingekenna zona nyamanna dingnen erdalan sekalak. Labo mesukah man Jakup guna ndalani persoalen si mberat e. Kerina e arus i dalanina. Tupung i bas perdalanen, erkiteken latih akapna tertunduh me ia. I bas tunduhna ernipi ia jumpa ras Tuhan. Kenca medak turah kebiaren i bas dirina, erkiteken ingan si ipedemina e me ingan si Badia.

E maka lampas erpagi-pagi keke Jakup jenari ibuatna batu si ibantalkenna jenari i pajekkenna jadi sada tanda peringet-ingeten. Ibahanna gelar ingan e Betel (Bet-El = rumah Allah).

Keke erpagi-pagi e me sada kegiatan si mehuli, sabap ope denga kita erbahan kegiatan i bas wari e, perlu lebe kita erpenggurun man Dibata dingnen ngendesken kerina dahin-dahin si ateta silakoken bas wari enda. Keke erpagi-pagi e me sada kegiatan si perlu si terapken guna kesehaten daging kulanta. Kalak si lampas medak, otak pe segar dingnen perukuren pe senang janah melala ka dahin si banci idahiken.

Jakup kenca ia lampas erpagi-pagi keke, erturih kel ukurna; teridah arah i pajekkenna batu si jadi bantalna jadi sada tanda jenari iamburkenna minak saitun ku batu tandana nggo ipersembahkenna man Dibata. Kenca ilakokenna si e ndai kerina, e maka nina man Tuhan, "*Adi itemani Dibata aku janah adi ikawaliNa aku i bas perdalanenku, janah adi iberekenNa bangku uis ras pangan, adi selamat aku mulih ku rumah bapakku, e maka Tuhan me jadi Dibatangku.*" Perukuren enda turah kenca Jakup keke erpagi-pagi.

Pengalaman Jakup banci jadi pengalamanenta. Lit nge perbebennta tapi tupung kitatunduh Dibata su njujuri perukuren si mehuli. E maka kekelah kita erpagi-pagi, nerusken pendahin si mehuli.

**"Perukuren turah tupung kita keke erpagi-pagi"**